

四庫全書

史部

欽定四庫全書

史部

湖廣通志卷四十三

詳校官監察御史臣陳化龍

檢討臣德生覆勘

總校官知縣臣繆琪

校對官中書臣宋枋遠

謄錄監生臣倪景寬

欽定四庫全書

湖廣通志卷四十二

名宦志

總部

皇清李棲鳳字中梧遼東人順治二年任荊州分巡道
時兵火新定城內外悉瓦礫荆棘棲鳳日從十餘
騎出城射獵望有茅棚即策馬至其處分給所獲
狐兔以果民腹東南西北輪日分出婦子遙見獵

騎即舉火待炙未幾陞去疲民遮馬首婦女擊夫
人輿不忍放行後任本省按察使清廉儉素冰操
彌厲

徐起元遼東人鄖陽撫治當明末闖逆橫肆大江
以北悉無完城賊黨路應彪馮養珠數萬寇鄖設
計保守連圍數年竟以密計殺賊孤城獨完至
皇清順治二年率土歸版仍以撫治本郡事務

趙兆麟陝西富平人順治四年撫鄖適禁旅駐剿

出寇兆麟督糧餉撫殘黎夜不暇寢凡脇從者多
所全活民至今戴之

洪承疇泉州人順治癸巳督師經略五省駐長沙
便宜行事湔洗苛墨散藪澤之奸人心遂定長沙
聚兵數萬承疇以清勤鎮之悉稟約束分遣屯田
官給牛種詢父老疾苦奏蠲賦三年江浙餉楚軍
米數萬費逾直十倍限隔風濤多至後期酌令改
折就近買給薦舉皆得人人樂為之用三載凱旋

其功在潭人最多祀名宦

府志

趙廷臣鐵嶺衛人先為江南都丞有趙佛之稱順治癸巳授下湖南巡道兵民皆喜曰是趙佛來矣時軍需旁午守令多避匿廷臣倉猝辦治莫為持難遇刑獄皆極意平反廳事但聞脫械聲行路為之感泣尤以清幹稱歲時酬獻不敢至其門夜常秉燭治文書剖決無留滯歷官浙閩總督謚清獻張兆罷漢中人順治六年備兵上湖南招集流逋

免荒田之賦民漸安集九年再罹兵燹兆罷撫卹
備至捐貲賑饑病者濟以醫藥全活甚衆

李承尹陝西三原人明癸未進士先督楚學政稱
公明及備兵沔土更慈惠如父母絲粒弗取署內
常日中待炊民有鬻婦償債者捐俸贖之沔故有
官柴蓋民田而沒官者歲納有例業戶逃竄遺害
比鄰尹判田還里永蠲官柴之征城東門外蓮花
池數畝舊有魚課遺累網戶為立碑永蠲之一方

以寧

王燧字佩公川北人順治六年官岳常分守道駐
澧州西山賊肆虐燧守城捍禦城賴以完給民牛
種墾藝荒蕪政暇集諸生論文以振興風教輯岳
州府志若干卷

卞三元遼東舉人順治九年任荊州道疲民新集
夷陵以西歲苦寇擾三元鼓勵將士多所擒獲

王師南征駐牧荊州一切供給皆躬自裁酌民忘其勞

胡全才字體舜文水人懷宗癸未進士順治間撫
鄖招徠流移教養備至時流寇未靖全才誅叛納
降調度主客兵皆有方畧又創建營房修理城郭
襄民愛感

楊世學字納銘當塗人順治丁亥進士授武昌分
守道多惠政有朗鑒遇疑獄剖斷如神時黃陂有
賊號檣天黨嘯聚光羅諸山世學部兵討之入境
一意招安羣盜遂納款士卒所過秋毫無犯邑賴

以安

呂陽字全五無錫人懷宗庚辰進士順治初以薦
舉授下江防兵備道駐蘄州居官冰蘖自茹神明
獨斷吏胥屏息力行保甲以絕盜源捐造巡船增
修瞭臺自潯陽上至漢川民咸安枕麻黃之東山
故多盜撫其渠帥李有實等經略洪承疇特疏

題叙又新蘄學宮及名宦鄉賢二祠課士衡文尤精
藻鑒云

狄敬字陶鄰江南溧陽人順治己丑進士任湖北
督學持身廉潔秉衡公明所拔孤寒之士成名者
甚衆秩滿遷陝西潼關道

孔自洙浙江嘉興進士由福建學政分巡荆西甫
八月以病歸去之日行李蕭然沔人遮道送之其
題署中別業云間揮麈尾封疆靜細嚼梅花肺腑
香至今誦其詩如見其人

李棠馥字漢清高平人順治丙戌進士督學湖南

一時棘闈所得士多出門下尋以參議分守郢中
留心民瘼不事繁苛凡地方利弊汲汲興除惟恐
不及故吏畏其威而民懷其德

王自新字子南句容舉人素有文名歷陞湖廣督
學振靡起衰所列優卷率有唐宗八家之風每試
卷必親校閱積勞成疾試荆未竣而卒江漢之士
莫不悲泣

陳士本字頡仙江南武進人康熙四年任湖北道

平易寬惠奉

有清丈田畝躬行阡陌荒熟井然民無賠累親自督修隄防以積勞成疾卒於官囊無一錢淺葬善德山翟鳳翥字象陸山西曲沃人順治丙戌進士由郎署歷臬司陞湖廣右布政使雅意愛民好賢樂善修江漢書院建奎星樓選士數百人讀書其中督課每月六試前列者皆優賞之所得士如汪錞金德嘉周之麟等皆其翹楚又延請名士講述六條

及濂洛之學楚人思慕不置

李呈祥號五鹿翼城進士順治間任湖廣兵巡道
駐興國州州有負固者呈祥多方招徠之勵已清
正決獄明斷又延碩儒講學於赤庵一時名士皆
出其門累陞兵部侍郎

余三汲遼東人初任黃州同知持廉秉公百務具
舉陞知本府未浹月改知武昌黃人如失慈母治
武郡當軍興旁午游刃有餘而清操彌著轉本省

驛鹽道尋陞山東按察司轉粵藩卒

以上舊通志

劉昇祚

詳忠臣志

吳璵字銅川沁州進士歷湖廣總督先時巡撫楚北值夏逆初平歲荒民多流離下令所在招徠安集捐米賑饑全活甚衆次年秦省饑民多流入襄郢間加意撫恤俾得漸次還鄉及總制全楚為政寬厚斥深文之吏除操切之術整飭營伍作興士類吏畏民懷

郭世隆鑲紅旗原籍山西孝義縣人任湖廣總督
時民間苦小錢惡濫捐金收買鎔銅易價私鑄遂
絕歲款禁富賈囤米設法平糶米不騰貴革除鹽
商陋規鹽價以平尤加意軍政糧無浮冒將不偷
安湖南苗人作梗輕騎深入相度形勢移置營壘
以便守禦有願就撫者許以自新邊境晏然尋遷
兩粵總制

額倫特

詳忠臣志

楊宗仁奉天遼陽人初知湖南慈利藍山二縣循聲久著雍正元年陞任湖廣總督楚人聞其來皆額手稱慶甫到勵精吏治曉夜不遑念

聖諭廣訓一書廣大精微與典謨相表裏化民成俗之方端在於此敬遴公所一區每逢朔望躬詣其地宣揚講解懇摯詳明一時僚屬軍民無不振興鼓舞性廉潔不受一錢鹽商舊規數萬及一切饋遺悉為禁絕荆關舊有落地稅後因征榷之員妄沿

陋例并徵往來行旅貨物宗仁於署篆日廉知積弊盡革之自此楚蜀商民正供外絲毫不聞取索偶遇鄰省饑黎流入楚地立委員撫恤慮其釜鬻薪水倉猝或缺於供勢不可湏臾緩先為糜粥食之後則按名散賑寒予絮衣歸給口糧咸獲安全去以楚為澤國尤加意隄防歲時巡行修築東作之始減從輕騎率屬出四郊勸農捐俸備物給老壯以示獎勵且諄諄教以孝弟忠信焉尤勤於訓

練在任三年凡三營將備及湖南各汛武弁考校
精覈木標兵丁按期校習賞罰公明士卒競奮挽
強命中壁壘一新疾革前數日猶至箭道選閱竟
以積勞卒於官贈少保謚清端加祭一次世襲拜
他拉布哈勒番楚民建祠於高觀山南祀焉雍正
九年入祀名宦雍正十年

特祀賢良祠子文乾任廣東巡撫

劉兆麒鑲白旗人任湖北巡撫康熙元年西山李

來亨作亂轉輸維艱均派馱夫麒籌畫撫恤楚人
賴之又於高觀山南關地作教場操練士卒軍容
大振嘗置獄田收其租衣食罪囚其仁慈多類此
張朝珍字玉筍正藍旗人任湖北巡撫時大兵進
勦吳逆軍務旁午差使絡繹珍運籌一切不遑寢
食造戰船以練水師建浮橋以渡兵馬設炮臺於
江渚預防賊舟東下運糧進蜀不派民夫歲饑捐
貲賑濟以勞瘁卒於官

丁思孔三韓人順治壬辰進士由江蘇布政使巡撫湖南時逆藩始平拊循痼瘵務存寬恤費舍鞫為茂草博士倚席不講慨然以振興為己任疏請頒發國子監校刊經史置岳麓書院中政暇集諸生討論以長育人才儲為國用至今岳麓有丁公講堂祀名宦

趙申喬字慎旃武進人康熙庚戌進士以刑部郎家居

特召見擢浙江布政使陞巡撫未一載調湖南

聖祖仁皇帝

諭以力減加耗盡革私徵有藐法害民者糾參從重處
分申喬下車大書

聖諭勒石建亭檄告屬吏大略謂

皇上寬已徃之愆開自新之路若州縣依舊苛索司道
通同徇隱詢聞所及白簡隨之斷不姑息容忍使
髓枯赤子終無求活之門膽大貪官仍享悖入之

利且云澄源端本自巡撫始若稍有不法爾等官
民即共聲其罪於是屬吏惴惴禁革一切私派名
目定頒漕米斗斛官為收解驛站夫馬工料等銀
於本州縣實徵銀內坐支倒馬銀兩隨倒隨支又
革除鹽商規例核府州道里遠近酌平鹽價兵米
按月徵給解項仍七月開徵兵民交便二耗行月
先給後

聞丁漕無悞奏准貢生選教職各就湖北湖南占闕州

縣列上貞節有踰月具詳者即按懲胥吏復請準
舊例給建坊銀楚屈原漢賈誼宋李希明蔡道憲
周二南諸祠皆為葺垣宇還侵奪選廉黜墨毫無
瞻顧撫湖南凡八年俸入以外惟咨部隨丁銀二
百餘兩米七十二石藉資朝夕簿書填委壹不假
手他人凡屬吏進見和霽容色使得各盡其情未
嘗逆詐億不信然嫉惡如仇亦未嘗少貸辛卯正
月陞左都御史百姓執香叩送者數百里不絕所

在建祠繪像又輯其章奏文移條教之屬鏤板以傳名曰趙公實政錄先是鎮草紅苗未定遣大臣徃撫申喬同被

命勅兵備警既而苗人款服振旅以歸是夕行營聞礮聲衆錯愕莫知所為申喬從卒纔二十餘人端坐自如既而問之則督臣帳前開烏鎗聲也生平靜鎮類此丁酉冬

聖祖仁皇帝面獎及之時申喬為戶部尚書四年矣又三

年卒

諭祭葬諡曰恭毅

皇上御極

特寵褒綸追加宮保祀湖南名宦雍正八年

特祠賢良祠孫侗數奉

特恩陞授襄陽知府

李發甲字瀛仙雲南河陽縣舉人任湖南巡撫始下車值大雨積日湖水驟漲岳常所隸八縣衛民

被水艱食發甲借帑五千兩以賑乏絕並發倉穀
以平市價亟於採蓄遂先舉行後乃入告剔蠹釐
奸公清尤著勅建湖湘書院弘闢講堂周以廬舍
俾秀民之選肄業其中

皇上念湖南闊遠

特恩開南闡鄉試八郡三州之士得免越重湖復均霑
解額中雋既多文教一新貢院費不煩而竣事速
大半皆發甲所經始也發甲以勤瘁卒官

聖祖仁皇帝愍綸褒卹

賜祭葬祀湖南名宦

陳瓚廣東人由進士歷官湖南巡撫下車之日衣冠儉素馬後老僕三人負敝簾以從屬僚迎境上莫知為誰頃之間都御史已至院中皆驚歎瓚風稜峻厲屏絕苞苴草加增火耗以裕正課定子庫息錢以惠窮黎半載

內召調福建巡撫雍正八年

特祀賢良祠

高其位字宜之其先山東高密人徙鐵嶺家焉父
天爵死耿逆之難贈太僕寺卿謚忠烈其位初以
蔭授鑲白旗蒙古固山筆帖式襲本旗佐領吳三
桂叛於滇授軍營參領從帥范達禮出師駐襄陽
值總兵楊來嘉叛命與同官劉繼卿率二十騎往
覘虛實時賊兵潛越南漳縣襄城中莫之知也至
土地嶺與賊遇賊約二萬人其位語同事者曰賊

雖衆我輩決無退避理但當遣騎飛報襄陽使速
為備耳即策馬衝賊賊出不意咸大驚勢稍亂其
位且斫且馳竟得突至南漳城呼城中人以入急
為畫守禦策徧視身上衣血模糊莫可辨所持刀
口盡缺初不自知也叛賊譚洪率舟師號三萬衆
向鄖陽范帥止授其位卒百人俾守楊谿舖以扼
之賊蠶至其位踞崖射賊矢無虛發相持七十日
糧盡煮馬鞍以食誓必死會副都統李麟隆擊破

賊得全兵歸由是每戰輒先登前後給功牌十二
旋奉

旨歸京師久之補永昌副將以才守第一督撫屢薦擢
襄陽總兵官撫輯軍民簡練戎務先是兵丁子弟
多不知學乃立義塾捐俸延師訓以忠孝大義皆
感悅每值旱潦步禱立應在任五年陞湖廣提督
政績一如在襄時後拜文淵閣大學士晉少傅世
襲二等阿達哈哈番卒謚文恪長子起官上荆南

道

郎永清奉天廣寧人由山東按察使擢任湖南布政湖廣開藩南省自永清始時干戈初靖瘡痍未復長民者益誅求無藝用自封殖斃斃子遺永清蒿目傷心招徠撫育民得安堵尤勵風操勤吏事凡民間利病政理得失侃侃持論必達其志而後已永寶諸郡溪流悍急歲漕為艱力請改折得上聞報可湘衡以南舊食粵鹽灘險道遠商民文病申請

改食淮鹽至今稱利便其他繕城垣修學校戶口
田賦條目井井可以經久傳遠士民追維遺愛既
請祀於瞽宗復建專祠撫臣趙申喬為記

施世綸福建人湖南布政使初涖任除陋規減火
耗振刷利弊官吏懾服湖南自康熙三十年丈量
之後里役雖免而正餉外有徭費額漕外有京費
世綸革徭費減京費存四之一士民勒碑紀其遺
愛云

吳毓珍遼陽人順治乙未進士任湖北按察使康熙甲寅大將軍貝子統兵進勦吳逆以珍廉能委令督輸糧草水陸運饋不絕時蘄州兵將不和鼓譟生變珍訪拏巨魁安輯衆卒兵民帖然歸已運夫一案禁止各屬毋得科派聞有乘間掠賣民子女者下令嚴察奸宄斂跡

張道祥江南徐州人任湖北按察使清慎明決庭無冤民冬捐獄囚綿襖夏給茶湯掃除穢惡戒獄

卒無得凌轢深悉詞訟株連拖累之弊痛加懲革
買城東洪山地為義塚贖鄧劉兩姓子女分離者
令其完聚及卒蕭然無餘貲

蔣永修號慎齋宜興人順治丁亥進士督學湖廣
以師道自任釐正文體凡鄙師俗儒沿襲陋格刊
傳示禁風氣煥然一新創葺學宮四十二處復石
鼓等書院請復瀟溪世襲設立義倉義學敦勵士
行表揚節孝人咸勸慕祀武昌名宦

葉映榴

詳忠臣志

李會生夏邑人任湖北上荆南道居官清勤每朔望率屬宣講

聖諭勸士民各務本業嚴飭保甲匪類遠遁民情翕然
張忠孝洛陽人由行伍累官辰州府副將以征剿
夏逆功授夷陵總鎮左都督卒贈太子少保

劉顯謨鑲藍旗人任湖北上荆南道立學興教輯
兵安民濱江長隄歲被水囓謨盡心築護不派里

民一錢至今德之

趙廷標字叔文錢塘人順治七年任衡州府同知
擢分守長寶僉事改補湖南分巡驛鹽兼理糧儲
副使廷標為人樂易愷悌有德於荆潭間劇賊剽
刼捕卒蹤跡籍記盡獲其黨廷標以兵禍初解斬
其渠二人餘無所問湘東兵以採樵為名轉掠百
里請於大府往諭之遂定廷標在衡時請蠲荒田
之賦又為粥賑饑全活甚衆及為副使行部至衡

衡父老見之流涕曰吾慈母來矣羅拜車下廷標
慰勞如家人祀名宦

張仕可丹徒人康熙丙辰進士分守衡永郴道副
使嘗按行所部郡守具酒肴迎界上峻却之或謂
仕可此近於矯情笑而不答其後郡守以贓敗度
辜不可逃出其所籍記餽遺人數上之撫臣撫臣
趙申喬檄仕可鞫其贓款會屬吏皆進見謂之曰
衡永道我之鄉人今鞫一郡守不屬他人專以屬

衡永諸君得無疑我私乎因舉籍記示之獨仕可
無絲毫染皆愧服招撫紅苗與有勞績申喬特疏
薦尋卒於官

湖廣通志卷四十二

欽定四庫全書

湖廣通志卷四十三

名宦志

武昌府

漢董宣後漢書列傳字少平陳留圉人初為司徒侯
霸所辟舉高第累遷北海相後江夏有劇賊夏喜等
寇亂郡境以宣為江夏太守到界移書曰朝廷以太
守能禽姦賊故辱斯任今勒兵界首檄到幸思自安

之宜喜等聞懼即時降散

三國程普吳志列傳字德謀右北平土垠人領江夏太守治沙羨好施喜士大夫後代周瑜領南郡太守復還領江夏遷盪寇將軍

甘寧吳志列傳字興霸巴郡臨江人往依劉表不見進用後轉托黃祖祖又以凡人畜之於是歸吳周瑜呂蒙皆共薦達孫權加異同於舊臣寧陳計曰今漢祚日微曹操彌憍終為篡盜南荆之地山陵形便江

川流通誠是國之西勢也寧已觀劉表慮既不遠兒子又劣非能承業傳基者也至尊當早規劉表不可後曹操圖之圖之之計宜先取黃祖權遂西果禽祖盡獲其士衆遂授寧兵屯當口後隨周瑜拒破曹操於烏林攻曹仁於南郡未拔寧建計先徑進取夷陵往即得其城時手下有數百兵并所新得僅滿千人曹仁乃令五六千人圍寧寧受攻累日敵設高樓雨射城中士衆皆懼惟寧談笑自若遣使報瑜瑜用

呂蒙計帥諸將解圍後隨魯肅鎮益陽拒關公權嘉
寧功拜西陵太守領陽新下雉兩縣

晉卞敦晉書卞壹傳敦字仲仁宛句人征南將軍山
簡以為司馬尋杜曾王如相繼為亂乃使敦監河北
七郡軍事振威將軍領江夏相戍夏口攻討沔中皆
平

郭舒晉書王戎傳舒字雅行王敦使守武昌督護繆
坦嘗請武昌城西地為營太守樂凱言於王敦曰百

姓久買此地種菜自贍不宜奪之敦大怒曰王處仲
不來尚有武昌地否凱懼不敢言舒曰繆坦小人疑
悞視聽舒不敢不言敦即使還地衆咸壯之

南北朝褚炫南齊書列傳字彥緒陽翟人歷江夏內
史罷還得錢十七萬於石頭竝分與親族及病者以
市藥

吉士瞻梁書列傳字梁容蓮勺人為巴東相又為武
昌太守在郡清約家無私積

韋叡南史列傳字懷文杜陵人梁武帝尅郢以為江
夏太守行郢州府事初郢城拒守男女垂十萬閉壘
經年疾疫死者十七八生者即寢處其上叡料簡隱
卹咸為營理百姓賴之

何遠南史列傳字義方東海郟人梁武帝時為武昌
太守本個儻尚輕俠至是折節為吏絕交遊杜餽遺
雖井水必用錢買乃飲車服尤敝素器物無銅錫武
昌水族至賤每食不過乾魚數片而已

唐韓仲卿愈之父李白韓仲卿去思碑記仲卿南陽人自潞州銅鞮尉調補武昌令未下車人懼之既下車人悅之惠如春風三月大化姦吏束手豪宗側目兼操刀永興二邑同化時兩京宋城易子而炊骨吳楚轉輸蒼生熬然而此邦晏如襁負雲集未居二載戶口三倍其初銅鐵曾青不擇地而出大冶鼓鑄如天降神既烹且爍數盈萬億公私甚賴之官絕請託之求吏無絲毫之犯去若始至人多懷思白因採謠

刻石而作頌

柳仲郢唐書柳公綽傳郢字諭蒙華原人公綽子元和十三年進士擢第牛僧孺鎮江夏辟為從事仲郢有父風動修禮法僧孺嘆曰非積習名教安能及此宋楊礪宋史列傳字汝礪鄆人建隆中舉進士甲科開寶中知鄂州以善政聞

張詠宋史列傳字復之郢城人舉進士知崇陽宋名臣言行錄詠知崇陽時令民拔茶植桑未幾權務起

民免荼權而有桑利獨異他縣後又知永興軍

既少連宋史列傳字希逸開封人知崇陽崇陽劇邑
張詠為令有治狀後惟少連能繼其風迹

謝濤宋史謝絳傳濤字濟之富陽人登進士真宗時
知興國軍以治行召還對長春殿命試學士院

朱京宋史列傳字世昌南豐人登進士神宗時擢監
察御史以論大臣除擬有愛憎之私中書言其失實
謫監興國鹽稅

楊繪宋史列傳字元素綿竹人第進士神宗時知興國軍為吏敏強表裏洞達一出於誠

王素宋史列傳字仲儀太尉旦季子賜進士出身官屯田員外郎以御史中丞孔道輔薦為侍御史道輔貶素出知鄂州仁宗知其賢擢知諫院

梁燾宋史列傳字況之須城人哲宗時坐司馬光黨謫知鄂州作薦士錄載名姓人見書曰公所植桃李乘時而發但不向人開耳燾笑曰自侍從至執政薦

用不盡負愧多矣其好賢樂善如此

黃庭堅宋史列傳字魯直分寧人第進士為校書郎
紹聖初出知宣州改鄂州以直詞貶涪州別駕徽宗
即位起監鄂州酒稅不行

方澤明一統志字公悅哲宗時知武昌與黃庭堅游
贈之詩云庾公風流冷似鐵誰其繼之方公悅

李涪 詳忠臣志

趙善俊宋史列傳字俊臣知鄂州適南市火俊亟往

視事弛竹木稅發粟賑民開古溝創火巷以絕後患
省燕遊車騎鼓吹之費郡計用饒代輸民役錢

羅願宋史列傳字端良歙縣人淳熙間知鄂州至郡
上五事勸學劭農有循吏風值旱禱雨立日中得暴
疾卒鄂人懷其德繪像靈竹寺祀焉

趙方宋史列傳字彥直衡山人淳熙八年進士調補
圻尉疑獄多所委決

陸九齡宋史列傳字子壽金谿人孝宗時由桂陽教

授調興國軍地濱大江俗儉嗇而鮮知學九齡不以
閒職自佚益嚴規矩肅衣冠如臨大衆勸綏羽翼士
類興起

舒邦佐字平叔靖安人淳熙八年進士授蒲圻簿勤
恪有聲民歌誦不輟

劉清之宋史列傳字子澄臨江人孝宗時通判鄂州
鄂大軍所駐兵籍多偽清之俾以實自言而正之又
訪祀張烈婦墓及諭止計利尚鬼之俗

吳柔勝宋史列傳字勝之宣州人第進士嘉定中湖北運判兼知鄂州甫至值歲歉即乞糴於湖南大講荒政十五州被災之民全活者不可勝計

陳仲微宋史列傳字致廣高安人嘉泰二年進士知崇陽寢食公署旁日與父老樵墮相爾汝下情畢達吏無所措手

李宜明一統志理宗時知興國軍金使招之宜斬其使葺大成殿新貢院增貢士規免浮屠錢修富池驛

構滄浪亭百廢俱興

馮去疾明一統志號北山朱子門人理宗時知興國軍判定本四書於滄浪亭號興國本

郭彖字次象山東歷陽人理宗時知興國軍時郡無試院捐俸經營士人便之

舊通志

黃何楚紀字景蕭體寧人理宗時進士調大冶簿邑湖中三山產鐵尉巡警盜鑄者四千人起為敵何匹馬往諭焚其具一境晏然延朱文公門人萬人傑為

學者師子開為蘄州通判

元陳天祥元史陳祐傳天祥字吉甫自寧晉徙家洛陽至元中為從仕郎郢復州等處招討司經歷時興國軍以籍兵器致亂天祥權知本軍事領軍士纔十人入城諭以權置兵仗自衛民皆稱便由是流移復業隣郡民亦相繼來歸用土兵收李必聰山寨不戮一人他寨各散去隣邑分寧為變敗逃入境者數千人天祥皆保全之居歲餘代去而興國復變壽昌府

及諸城邑多應之天祥建策大敗其衆初行省盡執
鄂州城中南人將殺之天祥力為救止皆縱去復權
知壽昌府事為亂者皆依險自保天祥諭其徒使各
歸田里斬其長毛遇順等於鄂州市放王宗一等十
三人還家約三日歸獄皆如期而至盡縱之自是無
復叛者

鄭制宜元史鄭鼎傳制宜陽城人至元中戌鄂州攝
府事朝廷將征日本造樓船於何家洲洲地狹衆欲

徙旁居民制宜不從改授寬地居民德之城屢災
或言恐姦人乘間為變宜捕其疑似者痛治之制宜
曰吾但設守備而已奈何濫及無辜不答一人災遂
息有盜伏近郊晨暮剽劫流言將入城俄有數男子
自城外至顧盼異常命吏縛入獄問之無驗明日再
出城東遇乘白馬者貌殊異叱下訊之乃與前數男
子同為盜者遂正其罪一郡帖然

申屠致遠元史列傳字大用壽張人至元中為壽昌

府判官時寇盜竊發遠近騷然致遠設施有方衆賴以安

李恒元史列傳字德卿至元十二年宋將高世傑窺襄陽乃遣恒守鄂州時豪民聚衆侵江陵省命恒往討恒斂兵不動但諭使出降得十餘萬悉縱為民乃禁軍毋得擄掠饋獻一無所取

察罕元史列傳西域博勒和城人大德間中書省奏為武昌路治中丞相哈喇哈遜曰察罕廉潔武昌大

都非斯人不可治因除之時妖賊高仙道左道惑衆
平民誑誤者數千計罕與憲司雜治之得其情誅首
惡數人餘悉縱遣焚其籍以治最聞

劉碩 詳忠臣志

周鏜元史列傳字以聲瀏陽人至正中調大冶縣尹
狀若尪懦然有威不可犯邑有豪民持官府短長鏜
力去之惠愛窮民治行為諸邑最

明汪大本明一統志徽州人洪武初知武昌府構講

堂修齋舍郡士嚮學自大本始

樊繼明一統志字星昭句容人洪武初知興國州州
南有虎患禱於城隍明日兩虎自鬪死州西湖隄壞
捐俸築之興學校毀淫祠喪葬用家禮民多化焉
馬極明一統志永陽人洪武初知通城剪除凶暴撫
輯遺黎逾年田野闢戶口增境內大治

姚以德洪武初自建平丞擢嘉魚令地當敵衝流亡
幾盡乃闢草萊訓耕耨數年之間人蘇物盛民歌思

之舊通志

柯日新楚紀平涼人洪武初知蒲圻民多逋逃憂勤
撫輯墾闢草萊躬督農桑民皆襁負至遂創署宇修
學校置郵傳治橋梁百廢俱舉

戴城字邦固青田人洪武中由進士任蒲圻丞革弊
政修學校建讀書樓與諸生講學撫善鋤奸豪黥屏
息

舊通志

馮萬金黃州人洪武中知大冶披榛棘立解宇招流

亡勸農桑一一有法

戚元禮瑞昌人洪武初令武昌時兵火之餘荆榛彌望禮勞來不倦撫輯流亡創建學校其功最鉅

楊士元字復宇太倉州人洪武間由進士知興國修築州城以石甃之建書院於疊山祠旁前守文田未竟力竣其役方冊公平侵冒弊絕

上官儀沙縣人宣德間進士知咸寧文學政事獨步一時興廢起墜不激不隨士民咸被其德

莫震字廷威吳江人正統間由進士知嘉魚為人修潔春秋事神牲醴皆戒於三日前官舍有木偶神像投之江每親行郊野相土宜修陂池今龍潭周道之木皆震當時所樹者

以上舊通志

鮑旭明一統志字景升池州人正統舉人知興國嘗修常平倉六所樽節出納數年郡頗殷富水旱不為災朝天隄圯甃以石建石亭於上人名為鮑公橋

秦夔姓譜字廷韶無錫人天順庚辰進士知武昌府

創養濟院定均徭法積穀備荒建張乖厓祠葺黃鶴樓祀神江潯力縛劇盜首治妖伶皆善政也

孫倫字維序明一統志瀘州人天順戊戌舉人知嘉魚親藩旗尉強取民木倫使人諭之不聽加以刑王
大怒以欺侮奏衆為之危倫曰事苟公平雖死何悔
法司勘以非罪狀聞詔釋之

黎庸交趾進士天順間知大冶果斷明決除強暴不
撓於勢為校尉毛福誣罷銓司重其介請給半俸就

養宦所遂家焉

舊通志

周洪字廷誥明一統志上海人成化辛丑進士知蒲圻督農種粟麥植桑麻驗其勤惰賞罰之脩學舍考德義貧者資之令生徒父兄合力耕學田復其徭為教讀資置義倉六所儲穀三萬石至正德初大旱民猶被其澤

石磐字鴻漸仁和舉人成化間訓嘉魚性恬退諸生貧乏者多賙給之邑人李田任浙江參政於其謁選

資以官舟不受其故人為卿相招相見竟不往詣
馬炳然字思進內江人成化辛丑進士知嘉魚民有
為人作狀牒者炳然召而問之曰汝當安分畏法何
至為人造訟乎對曰窮無以養聊活家人耳炳然自
責曰不富焉能教厚其資使力本自是公門游食者
悉遁去

以上舊通志

王介明一統志侯官人弘治間知咸寧甫下車詢民
疾苦奸吏猾胥自去編丁產定賦役修宮觀橋梁以

贖鍰易穀萬石正德乙巳饑全活甚衆調江夏吏民不忍舍

李東字元震明一統志番禺人弘治中知興國置豪強十數人於法訟以息州多逋負徵一緩二輸無愆期勤於校士衆務咸舉

李銳字抑之安福人弘治中進士知崇陽積穀數萬石正德四年邑荒全活無算

姜溥字希廣廣德進士弘治間令嘉魚邑濱江水數

為患乃自百疋山修長隄二百餘里以捍漲溢

蕭立業字勤齋新喻貢士嘉靖中知咸寧廉慎恤民
輕徭薄賦吏奉法無所容私倣古行荒政治行為當
時最

莫揚字子克吉安進士嘉靖末知江夏時奉文丈量
率里老誓神揖弓正再拜曰願若屬成令長美衆感
泣雖窮山深谷無敢高下其手又力行條編法邑人
賴之歲旱微服蒲伏道旁大雨如注遷刑部主事卒

於官不能殮楚人在京者捐資會葬

李有朋號樂吾東陽舉人令武昌邑舊無城郭申請
建造不期年雉堞雄立又建澄清樓不盡亭以培縣
基修文星塔東臯祠以疏學脉

黃應龍字詡齋順德舉人萬厯間令武昌歲饑捐俸
糴粟施糜粥三月復請蠲田賦十之六民免殍離

胡嘉棟西華人萬厯間授武昌推官時稅監陳奉縱
羣校百餘人魚肉楚民商賈不行司道至有與結弟

兄者獨棟與巡道馮應京意合共持風紀盡逮羣校
薛長兒等置之死璫稍斂戢

顏文選字巽之宣城進士萬厯間令江夏獄無滯囚
潞府請湖田力為諫止又金口墻民房七百餘間江
坍火燬力請捐其租民皆德之以上舊通志

徐日久三楚文獻錄字子卿西安人萬厯庚戌進士
令江夏知民苦歲輸為胥吏侵食乃定期使自封投
櫃積弊一清委築江隄路隄及嘉咸蒲江四縣長隄

三役並興次第告竣而民不擾又為六條訓民上書
楚藩下白金五百兩贍諸宗之貧困者乙卯分校文
闈所得皆名士後以循異擢去

周曰庠臨川進士萬厯癸巳任咸寧令澣衣蔬食冰
檠自持邑東北近湖城且就圯建請築隄捍之城以

不隤

舊通志

龐一德字與虔南海人萬厯間知嘉魚學優德重獎
掖士子多所成就刻題名碑後續祀二賢祠

葛仲選字澹淵河西舉人萬厯間任嘉魚修築諸隄保障黃湖水不為災復建岳公樓修鐵橋亭拜風臺陞任去民祠祀之

吳仁萍鄉人萬厯間由選貢令大冶值通行丈量躬履田野熟諳弓步人不能欺冊成井井尺寸不忒數十年遵之

楊方盛字戒夫鶴慶進士萬厯間知大冶禮節不少假借元旦諸生稱賀坐定盛徐曰今日某某不出可

以徵品諸生皆慙清錢穀汰吏胥四境大治

以上舊

通志

蔡士用字汝賢邵陽人萬厯間任蒲圻諭提身耿介取予不苟諸生越禮者正顏責之不少假借陞德安府教授紳士立碑於學題曰泮水甘棠

郡志

倪斯蕙字禹同巴縣人萬厯壬辰進士令蒲圻立社倉審里甲除衙蠹正風俗稱賢令者以倪為首

宣大勲字蓋孚蒙化人萬厯癸丑進士初令黃安調

知蒲圻以盤石湖水漲每浸沒田禾築隄綿亘十里
名宣公隄

林增志字可任瑞安人懷宗戊辰會魁知蒲圻留心
愛養慎刑賑饑築隄防纂邑志修學課士一時獲雋
者多出其門

鄒逢吉字五從湖口人懷宗丁丑進士令武昌值峽
山土寇倡亂領閫帥劉承應搗平之暇即延諸生講
道論藝時流賊蹂躪江黃吉與邑紳士分門防守又

立龍虎二營倣戚繼光陣法令武舉石補天督率訓練賊聞而憚之後行取入京值闖逆犯關被執不屈死

陳鑑字子明廣東舉人懷宗時任江夏諭日聚生徒講論經義博綜風雅不責脩脯庚午應貴州闈聘所得皆知名士

鄭學陸字翼宣西安舉人懷宗時令大治時盜賊盛起陸計擒巨魁柯篤生等數十人丁丑峽山呂瘦子

叛獨運方略與守道袁繼成協力滅之

以上舊通志

徐學顏

李毓英

汪文熙

戴良瑄

曾棧

李之秀

王良鑑

以上俱詳忠臣志

皇清官撫邦字綏之蘄水歲貢順治間任大冶訓學問
該博詩古文詞卓然名家善書法常自撫謙其言
呐呐至於教育人材惟恐其不盡成也披荆立學
尤為勞勩有琦珩詩草

盛治字霖襄江都人順治己丑進士令通城縣城
被闖獻焚燼治招民入城給官地使建市廛歲荒
捐貲買穀三千餘石賑之蟲虎為災虔禱於城隍
害悉除

謝鏐字碧巖廣東英德拔貢康熙十三年任大冶
令有奸民黃金龍之變同守道徐惺止諸路進剿
兵惟用鄉勇以次縛其魁邑免蹂躪以上舊通志

張芑

詳忠臣志

鹿兆圖山東貢士順治五年令武昌兵燹之餘招
墾田地撫輯流亡凡催科折獄不尚嚴峻民皆化
之清介自守而葺學課士則捐囊不惜陞汾州同
知行李蕭然有做官不愛錢起身無盤纏之謠祀

名宦

邱象升山陰人順治乙未進士康熙丙午通判武昌值通城民因積逋聚譟單騎往諭開誠布公衆感悔輸納恐後其徵收南漕除陋規清積弊督理捕務搜剔奸宄吏民畏服祀名宦

漢陽府

唐杜公失名開元末為沔州牧與李白相友善有惠愛於民時人以杜公呼之

舊通志

賈載至德中為沔州刺史賈至秋興亭記載吾家之良也理沔州未期月而政和於訟堂之西因高構宇不出戶庭在雲霄矣

宋程適先世中山人遷洛陽太宗時徙黃陂令清謹過人卒於官贈司空

舊通志

程珣字大中明一統志黃陂縣尉先是珣父適令是邑而卒珣因寓居後為尉有惠政邑人思之二程夫子生焉

張先字子野開封人天聖二年進士為漢陽司理參軍遇人渾渾不見圭角而志守端直臨事果決

舊通

志

游酢宋史列傳字定夫建陽人第進士晚得監察御史歷知漢陽軍視事之餘召士講明性命之學風俗丕變

張汝明宋史列傳字舜文廬陵人徙居真州徽宗時僉書漢陽判官田法行授牒按境內使四隅日具官

吏所至即躬臨閱實雨雪不渝吏不得通賕賄而稅均於一路

胡敦實字觀光靖安人紹興初為漢陽幕官保全辰

倖何允以忤秦檜罷

舊通志

黃幹宋史列傳字直卿閩縣人寧宗時知漢陽軍所至重庠序先教養值歲饑糴客米發常平以賑請罷移粟禁糴之令且告糴於制置司旁郡饑民輻輳願歸者給糧願留者給廬民大感悅嘗上築城儲積議

於解後鳳棲山為屋館四方士立周程游朱四先生祠

曹彥約宋史列傳字簡甫都昌人第進士孝宗時漢陽缺守檄攝軍事時敵人大入彥約訪土豪得許高趙觀黨仲昇等敵圍安陸遊騎闖漢川彥約授方略擊走之以功進知漢陽軍

劉剛中字德言光澤人嘉定間調漢陽簿與黃幹友善切磋之益居多

舊通志

徐安民明一統志理宗時知漢陽軍修城建公宇祠
壇捐俸不取於民植松杉榆柳三萬餘於郭內後無
一人忍伐者

元盧克治字仲敬開州人明一統志漢陽守時郡邑
新附人心洶洶克治布宣上德撫慰綏輯一郡向化
馮翼吉安人第進士任漢陽丞以清雅見稱舊通志
秦文郁開封人明一統志漢陽尹政聲大著民懷其
德

許弼字賢輔益都人明一統志漢川尹政教休明德
行顯著民心悅服

明胡興福洪武中以明經令漢陽招集流亡撫惠瘡
痍墾闢草萊疆理土田創置署宇百廢皆舉而民不
知勞焉

程瑞本郡人洪武初守漢陽肇建廨宇修立城樓招
撫流移居民安堵

以上舊通志

蘇恭讓玉田人明一統志洪武初守漢陽為政簡而

明嚴而不苛郡有重役輒詣上官反覆陳說多得減省

趙庭蘭徐人明一統志洪武初令漢陽能愛民任事朝廷嘗遣使徵陳氏散卒他縣多以民丁應蘭獨言無有鳩工簡材創置縣治民不告勞

劉拱宸字守中吉水人洪武二年以賢才薦知黃陂縣性廉潔邑民郭俊英掘地得黃金極多以三斤十二兩進拱宸正色却還之時文廟傾頽與廣文周賢

合力捐建補葺二程讀書處訪得裔孫名祖川者令其守護暇即訓課士子一時人材蔚起在任七年士民紀其善政十二條於石以誌不忘後以老乞休貧不能歸遂家於陂

王叔英字原采黃巖人洪武中令漢陽值歲旱齋沐懇禱甘雨遂降後雨不止復禱於神即霽著有漢陽禱神文二篇

以上舊通志

楊觀上饒人明一統志洪武間令漢川輕徭薄賦弭

盜修學政行訟清百廢俱舉

王恭字克莊靜海人洪武中以蘇州守謫漢陽同知
老成持重體恤民隱有古循良風去任行李蕭然

孟驥字子良徐州人洪武中為漢陽府推官忠直廉
幹後陞貴州布政使

龔巖崇明人洪武中由舉人令孝感修學校勸農桑
律已嚴明吏民畏服

羅勉吉水人洪武中舉賢良方正任江夏縣丞擢知

孝感公嚴有為興舉庶政邑民懷之以上舊通志

徐述楚紀字信古建德人永樂中守漢陽興學校課
農桑創建譙樓修葺壇壝政教大行時採大木設法
完解民若弗與其役者歲歉民艱於租輸關市得鈔
數十萬代民輸之郡有虎傷人為文禱神虎害遂息
王靜楚紀字永靜黟縣人由貢授監察御史永樂時
巡視湖廣未幾謫守漢陽釐弊清獄貸逋賑乏又刊
文公小學及陳定宇通略以惠初學

王佐南陽人永樂中任孝感主簿立心慈祥政教明

達超拜監察御史

舊通志

潘文奎字景昭永嘉人明一統志宣德初由左春坊出為漢陽府同知清慎寬厚有愷悌之德

朱祐楚紀字逢吉邵武人宣德中守漢陽府舊無廩庾軍民輸於武昌奏請立倉府城民甚便之

孫收字麗中山陽人明一統志宣德間以江西僉事左遷漢陽同知公平廉慎雖當繁劇而裁處雍容務

從寬惠吏不忍欺民懷其德

趙弼蜀巴人號雪航永樂中授漢陽縣教諭學問淵

博善訓誨著有通鑑膚見郡志等書

舊通志

何淡順德人明一統志成化中守漢陽愷悌廉平明
於決獄哲於知人在任九年清白如一日

林堪莆田人明一統志成化中由進士令漢川純厚
近民廉介不苟暇與諸生講誨不倦

李恒儀封人成化初令黃陂教民植桑棗民受其利

歲饑設法賑濟多所全活

張銳秦州人弘治中與扶風張文質皆由進士前後任漢陽守銳諳於刑名勞於荒政質張弛有序操履不苟郡人俱稱為好官

以上舊通志

何亮字文明登州人明一統志正德中守漢陽清謹廉介絲毫不取於民折獄如流無不悅服卒於官

徐弼漳浦人明一統志正德中通判漢陽簡默愷悌尤慎操守時大盜劉六等來寇舟泊城下郡無畏城

勢危迫弼倚城架木人得哨守郡賴以安

樊景麟新繁人明一統志嘉靖初守漢陽鯁介不阿
政尚綱紀尤加意窮民勤恤備至水嚙城址於詞訟
役隸計日借工隨城斂石時與家僮移巨石於署前
轉運江岸以身先民節省財費至今稱頌其德

鄧鏞豐城舉人嘉靖間令漢陽檢律詳密吏事精純
其處置山陽三圖拋荒田地裁減重支應付及多設

民壯卓然可行

舊通志

昌應會莆田人明一統志嘉靖中令漢川邑歲被滄
沒民不聊生乃極意拊循輕徭緩賦時羣盜嘯聚夜
劫民舍聞之即往馳逐盜截其耳去已得盜盡殺之
景王出封安陸奏討莊田濫及漢川中璫暴橫倍索
會固持之璫怒奏逮繫按察司獄累月當道承景府
意坐調去

劉本用安福進士嘉靖間守漢陽建譙門南紀樓民
不知勞興學校表節孝尤善摘發胥吏無敢舞弊者

舊通志

賈應春字東陽正定進士嘉靖中任漢陽守興廢舉
隆著有成績纂修郡志人稱善本

楊樞字細休華亭舉人嘉靖中任漢陽司理修建刑
署文章政事卓然稱最

梅繼勲宣城舉人嘉靖間令漢陽興學育材政先首
務多所裨益

謝廷蒞富順進士嘉靖間令黃陂正色繩人勤事愛

民舊多滯獄剖決如流雖穉子貧婦皆得以情自達
暇即與諸生課講

蘇景和瀘州人以給諫忤權相謫丞陞黃陂令安靜
愛民優士以禮常率衆論學於程祠定大中祀典

郭斗字應宿昆明人嘉靖癸丑進士令孝感政尚寬
厚而秉衷介介不可奪褒節義重養老酌民利害約
法不爽

陳輅南克舉人隆慶間令孝感庭無滯牘賦無蠹孔

入計當行乾糶羸馬朝京師

葉修南昌進士萬厯時任漢陽司理性剛正常面折人過藩臬皆憚之漢陽學廢賴以興復漢川田為潞藩奏割三之一民甚苦之查衡州有歲額解德安倉者申允移抵民為立祠

馬御丙綏德舉人萬厯間守漢陽練吏事善折獄餽遺悉不受慨郡乘漫滅銳意脩輯

張綸音朝邑進士萬厯間守漢陽己未劇盜竄起江

洋艤舟給客擔其資而委人水中號為淤泥牌賈舶
戒不敢前乃捕得數十人徧置通衢立杖斃遠邇以
安

朱珏休寧人萬厯間任黃陂尉潔已執法力鋤豪右
中以飛語亦不少變嘗自謂我要錢便是典史不要
錢便可比御史黃安耿司徒嘉之曰人而無慾豈直
一御史哉

馮有為武進貢士萬厯間任黃陂丞布袍羸馬命家

僮灌園自給署邑篆清約如故邑人張濤撫遼調官
經歷去

李應先字伊萬南安舉人萬厯中令黃陂性直愛民
折獄不憚彊黠曲直立辨理事常夜分不倦篤於課
士所拔多名雋延之署中同其子講藝不間寒暑

王明舉字浙泉海陽舉人萬厯間令黃陂耿介不阿
邑有宿猾素磨洗錢糧簿立燭其奸遂服罪又豪姓
某以盜中傷平民捕之邑賴以安捐俸修葺二程祠

及養濟院三年以病去

趙嘉煥巴陵人萬厯間補黃陂諭訓迪諸生諄復不厭見有一善揚之惟恐不至

祝世祿字無功德興人弱冠即慕二程於書無所不窺萬厯間授黃陂學博見登臺望魯處與諸生講習學禮其間低徊不去

蔣以化字仲學常熟舉人萬厯間令孝感崇節孝重師儒片言折獄咸服不寃時於郭外召父老問民疾

苦歲大侵躬為糜粥以鋪道有貧賂輒給席瘞之

余桂萼字毓蟾上饒舉人萬厯癸卯令孝感會疫擇
醫施藥多所全活復買向家灣地十餘畝為漏澤園
置學田修縣志完圯城數十丈

周三錫濬縣舉人天啟元年守漢陽操守廉潔每歲
俸不給別取家租佐之舊城孤懸無內牆捐資伐禹
梁山石周砌堅固後賊至登陴棄守民歸德焉

張大治字望平保縣人天啟間令漢川始至侗然若

無能奸胥健訟輩多欺之閱月悉得其姓氏始歷數其奸狀各置諸法有豪家計奪鄰地乘鄰人酣醉墜牆誣以盜縛送於官治厲色曰何不獻以地而解之時驚以為神後卒於官僅餘帛數尺

孫光祚字懷龍石屏州舉人令漢川獻賊犯劉家隔率衆直前抵楊子港與賊戰賊走鯉魚灘乘其半渡擊之賊溺水死者甚衆漢川舊無城池祚築城七里有奇壬午左兵南奔逼城下七日始去殺擄酷於賊

民賴城以安

劉養貞大足人懷宗丙子任漢陽府推官剛方自持
居恒止一葛一裘嘗云素與酒肉無緣郡中豪強盡
為之斂跡

以上舊通志

趙元有

夏統春

薛聞禮

以上詳忠臣志

皇清金漸皋仁和舉人順治十四年令漢陽性仁慈不

輕用峻法繩人遇歲歉捐俸賑恤修學課士給以膏火士民德之祀名宦

黃州府

唐員半千唐書列傳字榮期全節人中宗時出為蘄州刺史不顯任吏常以文雅粉澤禮化大行

左震涇縣人明一統志乾元間以贊善大夫出為黃州刺史豈弟剛決黃人歌曰我欲逃鄉里我欲去墳墓左公今既來誰忍棄之去唐書王璵傳肅宗嘗不

豫太卜建言崇在山川璵遣女巫乘傳分禱天下名山大川中人護送一巫美而蠱以惡少年數十日隨尤愴狡不法馳入黃州震晨至館請事門鏞不啟震怒破鏞入取巫斬庭下悉誅所隨少年籍其贓得十餘萬因遣還中人既以聞璵不能詰帝亦不加罪

呂元膺唐書列傳字景夫鄆州東平人德宗時為蘄州刺史頗著恩信嘗歲終閱郡獄囚有自告者曰某有父母在明日元正不得相見因泣下元膺憫焉盡

脫其械縱之與為期守吏曰賊不可縱元膺曰吾以忠信待之及期無後到者由是羣盜感義相引去後除鄂岳觀察使

杜牧唐書杜佑傳牧字牧之樊川人第進士泰和間為黃州刺史剛直有奇節吏民懷之

五代陳起南唐書列傳蘄州人昇元中進士為黃梅令時縣境獨木村妖人諸佑挾左道惑人俚民稍稍從之積數年至數百人男女無別號曰忍辱夜行晝

伏取資於盜倡言佑有神術能升虛空入水火州縣
憚不敢問起到官按戶籍取佑為里正不服嫚言且
斷令頭起告巡檢周鄴出兵捕獲之搜其家得乘輿
器物遂斬佑鄴欲宥其妻子起曰此皆瀆亂人倫不
可使有遺育乃併斬之由是知名遷監察御史

宋王明宋史列傳字如晦成安人乾德初為荊湖轉
運使開寶七年將用師南唐以明為黃州刺史帝密
授成算明既視事即完葺城壘訓練士卒衆莫解其

意俄而王師自荆渚棄戰艦而下即以明為池州至
岳州江路巡檢戰權都部署所向克捷遂平金陵
錢易宋史錢惟演傳易字希白吳越王孫第進士太
宗時通判蘄州上言今四方長吏競為殘暴非法之
刑非所以助治請除之帝嘉納焉

王禹偁宋史列傳字元之鉅野人咸平初知黃州聞
濮州盜夜入城畧知州監軍因疏江淮諸郡宜並置
守捉軍士閱習弓馬葺城壁完甲冑為禦侮之備上

嘉納之州境二虎鬪其一死食之殆半羣雞夜鳴經月不止冬雷暴作傳疏引洪範陳戒且自劾上遣內侍勞問醢襪之日官云守土者當其咎上惜其才命徙蘄州未踰月而卒

李宥宋史列傳字仲嚴青州人舉進士歷知蘄州歲凶人散委嬰孩者相屬於道宥命吏收取計口給穀俾營婦均養之每旬閱視所活甚衆或殺人以米十石給傭者使就獄曰我重賄吏爾必不死宥得其情

論如法

韓琚明一統志韓琦之兄仁宗時知黃州琦詩曰予兄天聖中尚攝齊安守兄才無不宜吏治孰可偶公庭常寂然所樂在文酒

馬正卿明一統志元豐間知黃州愛民下士廣學舍禁妖巫人咸感之

徐君猷神宗時知黃州崇儒重道下士愛民時蘇軾謫居與子由書曰舉目無親君猷一見如骨肉

舊通

志

蘇軾宋史列傳字子瞻眉山人嘉祐二年試禮部第
二殿試中乙科神宗朝知湖州上表以謝又以事不
便民者不敢言以詩託諷庶有裨於國御史李定舒
亶何正言摭其表語並媒孽所為詩以為訕謗逮赴
臺獄欲寘之死鍛鍊久之不決神宗獨憐之以黃州
團練副使安置軾與田父野老相從溪山間築室於
東坡自號東坡居士

孟震享元祐間通判黃州有令德時稱其庭為君子
庭庭中有泉蘇軾名曰君子泉

舊通志

范純仁宋史列傳字堯夫吳人元祐時因論濮王典
禮不聽家居待罪尋詔就職請出不已遂通判安州
改知蘄州

陳軾明一統志元祐間知黃州時蘇軾謫黃人皆畏
避懼其累已軾獨願交游期共憂患

劉摯宋史列傳字莘老東光人紹聖初知黃州再貶

蘄州居住將行語諸子曰上用章惇吾且得罪若惇
顧國事不遷怒百姓但責吾曹死無所恨正慮意在
報復法令益峻奈天下何憂形於色無一言及遷謫
意

洪芻字駒父樂平人宣和間為黃州酒正以廉潔自
持權酷有法

余童明徽宗時知蘄州時歲饑賑濟有方盡括境內
人戶第為二等量口貸之又度五邑城均粟置場立

法伺察民以為便

江安行龍溪人高宗時任蘄州教授學政嚴肅孝宗
稱為樸直敝家老子遷知澧州

以上舊通志

莫濛宋史列傳字子濛歸安人以祖廕累官大理寺
正時黃州倖奏親擒盜五十餘人上命濛窮竟既至
咸以冤告濛命去囚桎梏引倖至庭詢竊發之由關
敵之所遠近時日悉皆牴牾折之語塞濛具正犯數
人奏上餘釋之上諭輔臣曰莫濛非獨曉刑獄可俾

理金穀除戶部員外郎後除湖北轉運判官復知鄂州卒於官

任汲宋史任伯禹傳汲字師中眉山人通判黃州負氣節與兄孜齊名當時稱大任小任

趙令歲

詳忠臣志

家愿宋史列傳字處厚眉山人大觀間以愿曾入黨籍謫英州酒稅量移黃州數年始乞祠

朱晞字子淵休寧人孝宗初知永安民立生祠改知

廣濟請更合肥之兵從之徙知靖州上言襄漢通吳
蜀宜移武昌大軍戍襄陽以控漢沔孝宗嘉納

章燾字彥博宜城人孝宗時知蘄州為政寬平不擾
蘄產竹簾例充苞苴燾悉斥去之

以上舊通志

李誠之

秦鉅

甯時鳳

何大節

米立

以上詳忠臣志

陳仲微宋史列傳字致廣高安人嘉泰二年進士為黃州通判兼餉饋以身律下隨事檢柅軍興賴以不乏制置使欲上其最辭曰此職分也何最之有

楊揆宋史列傳字純父臨川人登進士第調麻城尉向士璧守黃州檄入幕尋以戰功升三官

韓世清明一統志知蘄州州人請為兵馬鈐轄有賊劉忠入境清設方略破之

王玠詳忠臣志

王益明一統志景定間知蘄州治尚寬和開麒麟山
立郡治見古墓石刻云本有千年地姑借五百年感
謝王刺史移我過西園

王彥明詳忠臣志

元伊遜特穆爾元史李黼傳至正中伊遜特穆爾任
黃梅主簿時賊陷武昌舳艫蔽江而下伊遜特穆爾
願出擊賊江州路總管李黼大喜瀝酒與之誓急檄

諸鄉落聚木石於險塞處遏賊歸路倉卒無號乃墨
士卒面統之出戰黼先大呼陷陣伊遜特穆爾繼進
賊大敗逐北六十里

張好古

吳汝

以上詳忠臣志

明陶安字主敬當塗人明一統志洪武初知黃州剪
荆棘建解宇闢田野均賦役逋民相率歸附

徐誼字宜叔壽昌人高祖征陳理於武昌命誼知黃

岡乃作詩送使者曰紅旗招颶壓滄溟畫舸長驅上
洞庭百萬生靈新撫納九重天語自丁寧猿啼山月
灘聲咽鼉吼江風水氣腥好語湖湘諸帥將漢家信
誓重丹青太祖見而壯之加授承務郎時兵燹後邑
里殘破誼撫綏流氓百廢俱舉

左安善洪武間知蘄州創衙署興學校公勤廉潔惠
政及人

何晚齡漳州人洪武中同知黃州有政聲擢守本府

廉明果斷才能益著九載考滿去行李蕭然

以上舊

通志

安貞楚紀洪武中同知黃州守法不撓為姦吏訐奏
被逮成獄事聞上諭湖廣提刑官曰律在法司守法
固宜貞佐郡所為朕訪之非其私也猾吏污讎以報
忿耳此風一長則有司無官矣遂復其官吏反坐

葉宗字承允永嘉人洪武間知黃州志量宏大決事
如神治行稱為第一

李仁字守道洪武中知黃州性端謹言行不苟謙以
下士慈以撫民凡廨宇壇廟學校倉庫皆竭力創建
與陶安婉美以上舊通志

錢敏楚紀舒城人永樂初知黃州首興學校勸課農
桑脩城池葺公宇文章政事為諸郡最

盛璞楚紀字玉夫宣城人永樂丁亥由國子生知黃
州不攜妻孥惟匹馬一僕警敏有才剖決無滯勢豪
斂避

滕霄楚紀字九臯汝州人永樂中知黃州廉能謹慎
政績顯著

嚴迪聰宜春人永樂間任黃州推官法紀森嚴鞠獄
詳慎民以無冤

杜遇春霍丘人永樂間以人材任黃岡尉清節特著
入覲不能具冠服緼袍拜闕下上見親擢為御史未
幾以他御史悞軍糧事並坐極刑後上命給葬求屍
莫得乃葬其衣冠於縣東七里螺蛳湖子名貴遂家

於黃

龐敬嘉興人正統間知羅田涖政嚴明律已廉介壇
壘鋪舍祠廟捐貲建置不憚經營

以上舊通志

余清楚紀巴縣人正統中知黃州持廉秉公政平訟
簡軍民畏服比卒囊無餘金人賻之乃歸

王坦楚紀字子平鄆城人正統中知蘄州政尚寬平
興學敬賢勤慎有守始終如一

莊轍字中輿上元進士明一統志正統間知蘄州廉

介仁惠百務俱興民樂於趨役劇盜逼境有被戕害者極為憂恤咸愛戴之

胡奎鄱陽舉人正統間令蘄水性寬厚與民興利邑有回風磯港通蘄湖達大江常為民患奎築萬工隄分障之立廟磯上以安江神患乃息

舊通志

徐泰字士亨江陰人明一統志景泰間知羅田清白仁恕教民務農桑四郊創便民倉以備凶荒邑糧轉運水次甚艱泰買蘄水巴河地建倉廩廳舍數十間

竝置附近田數十畝為歲時修倉費民頗稱便

楊珽臨海人景泰中以福建按察使左遷知黃州公勤直諒勤於撫字因遠奸佞卒罹謗誣士民惜之舊

通志

王霽楚紀字景明上海人天順中知黃州崇正闢邪興利去害綽有能聲九載考績陞僉都御史

林宗字存敬莆田人明一統志天順中授蘄州學正課諸生晨夕察其勤惰諄諄誘掖咸出至誠士人建

祠於學宮祀之

陳興許州人成化初知蘄水在任九年公平端慎始
終如一吏咸畏法民不忍欺

舊通志

戴中新淦人明一統志成化中知黃梅持身清潔蒞
政明敏學校公署廢墜者皆為葺治一時文物煥然
改觀

謝恭字文安休寧人成化己丑進士知黃州學問宏
博居官清苦舉廢墜興學校士民愛戴

盧濬天台人弘治間由進士守黃州廉直多惠政觀
風各邑所過名山水輒為題詠右文禮賢修府署毀
諸淫祠常泛舟江上風起舟子頻呼楠木大王問故
以妖對濬歸撰文牒水府限期以木至妖遂滅

以上
舊通志

汪倬貴溪人明一統志弘治間令廣濟時鄉民流徙
田為斬人所侵倬請於朝凡得田者即編隸焉民免
賠累

劉規字應乾巴縣進士弘治間令麻城優禮耆舊政尚德化有蒲鞭示辱之風二子相繼登第致仕歸

余貴綿州人明一統志正德中知黃州為政寬猛適宜軍民安堵學校公署修飾煥然浚井二十餘處民用利之名曰余公井

葉溥龍泉人明一統志正德中令廣濟洞察民隱以誠心蒞政無赫赫之威而吏不敢欺尤加意學校賓禮耆布有長者風

李純字在誠莆田人正德中知蘄州清慎律已愷悌
愛民善剖決豪猾無敢肆逞者

舊通志

王世祿南直廣德州進士明一統志正德間令麻城
平直剛簡視民如傷開新河建縣署民不知勞以調
任去

胡錠字希曾長垣進士明一統志正德間知黃州時
值盜警督兵防守保障有功歲饑設賑恤死者具棺
瘞之盡心民事如理家然

羅翰豐城人正德中任黃州推官抗直有清操讞獄
善求隱微多所平反

朱節山陰進士正德間任黃州推官性明敏不受私
謁遇文士雅敬重之

孟津字伯通丹徒舉人嘉靖間令黃岡不事嚴肅而
丰采巍然無敢譸張者退食正襟危坐雖家人不見
喜愠之色

韓秉文慈谿舉人嘉靖間任黃岡諭身範諸生不獵

浮譽一時名士咸出其造就

武鉞來安舉人嘉靖間任黃岡諭丰度恬雅博洽多聞遇貧士輒分俸給之

張性魯當塗貢士嘉靖間任黃岡諭慷慨多大節遇事正論無所隱諱啟聖祠祀捐俸修建

周祿廬陵貢士嘉靖間任黃岡諭溫醇爾雅與諸生縱談名理終日忘倦

姚益汝陽貢士嘉靖間任黃岡訓導性耿直事關學

校輒力爭之博學能詞賦嘗有登眺詩云鄉心一雁
遠時序二毛侵人皆賞其風韻適逸

吳淮鎮江人嘉靖間由御史遷守黃州簡重平恕以
文學飾吏治文廟禮器未備銷淫祠鍾鼎及佛像為
之建號舍二十楹於東坡書院拔兩庠諸生茂異者
數十人講習其中躬自校藝一時人材稱盛

郭鳳儀字舜符祥符進士嘉靖間知黃州性冲淡不
以家屬自隨政務寧謐比旱祈雨輒應王廷棟作文

紀其事

商廷試會稽進士嘉靖間知黃州簡重有威馭吏尤嚴肅無敢貪緣為姦者

張嘉孚鞏昌進士嘉靖間守黃州性耿介精敏遇事立斷馭吏甚嚴有犯輒抵罪舊學田二區隱沒十年出令清察復歸於學

吳宗周安慶進士嘉靖間任黃州司理練達有為深悉民隱與諸生談藝寒暑不廢尋以憂去

崔孔昕賓州進士嘉靖間任黃州推官剛正廉介門
無私謁持法不少假貸公暇與諸生論文多興起者
黎泮樂平舉人嘉靖中令麻城值歲祲盜賊蠭起白
晝羣奪倉廩泮擒為首數人杖斃仍命富戶平糶於
是食足盜息

高公勺內江歲貢嘉靖間任黃州丞政尚寬慈不銜
聲譽敝裘羸馬自得也署縣篆有黠盜議剗庫忽相
戒曰恐累高公遂解去

貢安國寧國歲貢嘉靖間任麻城諭日與諸生講習
署縣事清惠得民

楊最射洪進士嘉靖間知黃州清介嚴明不避權勢
凡乘傳士大夫並當轄差遣聞其風多迂道去徭役
大省

以上舊通志

勞樟崇德舉人明一統志嘉靖間令羅田值凋敝之
後身親會計稽賦懲姦新學廟葺石城凡事直行已
志雖上吏不能撓

李儁大理人嘉靖中任羅田簿不攜妻孥自甘淡泊賦役煩興不妄施敲朴值例應朝覲郡縣各先期啟行儁檄獨後至民皆憂其無備即日匹馬就道無所顧慮卒於京

陳子文閩縣進士嘉靖中令麻城明達有為徵稅糧立條編法民皆稱便

尚德恒南克進士嘉靖中令麻城建便民倉於岐亭脩學宮建名宦鄉賢二祠後擢吏部去

蘇松廣安州進士嘉靖間令麻城築河隄重建鼓樓
脩縣志額退思軒曰清風亭石坊曰體國愛民

石璽滁州舉人嘉靖末知蘄州荆王常泠淫暴惡璽
慙因祈雨詭令知州接雨跪烈日中須臾雨驟至平
沒尺許不令起璽憤甚密疏陳狀詔奪王爵廢為庶
人

吳國仕字長谷歙縣進士隆慶間知蘄州推誠愛物
捐俸數百金建文昌閣於浮玉磯置祀田二百石兼

賑士之貧者歲以爲例著之籍士民頌其德於江潯
立報功祠

賈應璧字文宿無錫進士隆慶間令黃岡倜儻有才
清介自持政尚簡要百姓安之

孫光祖慈谿進士隆慶間守黃州治先教化明察善
聽凡民瘼豪姦無不周知公餘與諸生論學不倦一
郡以治

以上舊通志

潘珏楚紀字玉宇婺源進士萬厯中知蘄州創阜民

倉踰年大旱民賴以濟自是益廣廩庾積粟至八萬餘石在任十年政行化洽

鄭夢貞福建人萬厯中由鄉舉知蘄州剛正不阿時太監陳奉開採銀礦檄貞監稅貞極言其不便一切反奉約奉劾貞及江防參政沈孟化遂降調去

錢兆元字長人仁和舉人萬厯間知蘄州每日焚香告天方出聽事民自以為不冤暇則進諸生講課特三王之國供用浩煩民多驚懼元以身任之卒得無

擾

陳策

詳忠臣志

樊守純西平人萬厯癸丑為廣濟丞有幹略邑自戊申江水破隄癸丑再決委純修築由盤塘至龍坪接黃梅壩六十餘里計租起夫立期赴工畚鍤杵築悉有程度比告成高固倍前永賴其利

武圖功曹縣進士萬厯間任黃州推官為治清簡獄詞無大小洞矚真偽有嘉石旃石之誦入覲秩滿出

為辰州太守轉湖南憲副

劉烜漢陽貢士萬厯間任黃岡諭持守方正非孔孟之言不道間居亦不踞坐跛立嘗謂清貧二字為學者立身之要云

秦煒容縣歲貢萬厯間令黃安歲侵盜起民多流移煒悉心撫恤遇盜犯輒殪之民獲安集

羅應鵠歙縣進士萬厯間令黃岡平易近民勤於撫字兼深經學好引掖人才五載課績為最

趙士登字應庸涇縣進士萬厯中由武昌令調黃岡
專務德化察民疾苦有不便即時除去聽獄片言立
折奉詔丈量田畝調停曲當邑人咸受其庇

涂宗濬字吉甫南昌進士萬厯中由江陵令調黃岡
先是邑饑疫令多苛猛失民心流亡過半濬蒞任勤
恤民隱布利澤搜蠹孔夙猾膽栗莫敢犯漸安集後
擢御史去邑人貌其像與趙士登並祠

曹愈參字古清涪州進士萬厯中令黃岡躬儉約政

敦大體不事繁苛獄訟哀止邑試儒童廣額至千餘
名子弟賴焉其母病篤士民相率籲神數日果愈以
卓異擢吏部考功主事

徐紹曾字表耿海寧進士萬厯間令黃岡有魁盜夜
殺人按之急遂調懇上官幾為移聽士民代曾辨雪
能聲益起會倭徭交倣徵發不時又中使採權出楚
郡邑橫被荼毒曾極力捍蔽民深德之

林兆箕莆田舉人萬厯間任黃岡諭遂於經學集諸

生課藝寒暑不輟多所造就

茅瑞徵字五芝歸安人萬厯辛丑進士初令泗水有循聲調繁黃岡凡保甲賦役水利郵傳皆備極經畫公餘手輯邑乘勒為成書

曾維倫樂安進士萬厯中任黃州推官攝黃梅令下車問民疾苦覽山川風土旌良善翦兇暴學宮壇祀城垣修葺一新梅邑濯港至孔壠地最卑濕捐資築隄四十里民賴其利

閻士選江都進士萬厯中令蘄水時奉行方田令選與士大夫里老等制弓格計便宜度肥瘠促民秋歛畢令戶自為丈佛假手胥吏欺隱杜絕更加意風化於蘄鄉賢中舉孝弟忠信禮義廉耻八行名以一人當之刊刻成書家喻戶曉俾人知所做法

孫善繼萊陽進士萬厯間知蘄州下車即值歲荒勸庠生楊永貫出積穀六十石富民黎朝臣捐金四百兩次第設糶煮粥賑濟賴以存活者甚衆

杜長春字貞陽綦江進士萬厯中知蘄水摘奸罰惡
不畏強禦清覈錢糧無欺隱包賠之弊每月課士士
咸爭自濯磨

王世德字廻溪永康進士萬厯間任黃州推官宅心
仁恕練達機宜尤留意人材修葺問津書院擇師課
士人稱盛舉

劉應昌字燕及桐城進士萬厯間令廣濟為治敏練
大吏重之凡疑獄多屬聽斷他邑爭以訟來決蘄豪

鄒長武斷殺人昌拘斃之獄司吏徐某下通書吏為
奸廉得詳治之建滄浪橋修梅浦閘又樹碑前賢墓
崇祀孝子一邑向化

祝萬齡陝西人天啟間守黃州崇教化以木鐸徇路
興賢舉善凡三載奸宄皆感格為良民嘗曰吾輩讀
聖賢書奈何一領簿書棄之如遺因集兩學諸生於
定惠書院講誠明之義咸稱為關西夫子

關士琦字褐公桃源人天啟甲子經魁署黃梅諭博

學工詩文日夕課士品隲不爽甲戌成進士授南安令

戈允禮字敬輿保山進士天啟間令麻城僅八月弊革風清邑人方之召杜

李希沆字鼎武慶陽進士懷宗時令黃岡流寇肆掠沆設備禦敵有警輒戎服佩刀單騎先馳邑中義勇從之民賴以安

李汝璪字衡嶠南昌進士懷宗時知蘄水性廉介凡

民情吏弊毫髮難欺值大造黃冊編審里甲稱平行
保甲嚴更漏創興賢庄田以贍貧士庚午癸酉兩次
分闈得人最盛

趙利珍滕縣舉人明末令黃安督兵拒流賊親冒矢
石屢獲奇功賊相戒不敢近珍撫循有術士民樂附
大江北倚為堅壁以顛直不阿解任去

龔鼎孳字孝升合肥人懷宗甲戌進士令蘄水值流
寇猖獗孳籌畫方略調度兵餉修城池登陴防禦不

少休息賊勢少緩即進諸生講學好士愛民治行為

全楚第一以上舊通志

馬人龍詳忠臣志

張登衡字埜心桂林舉人懷宗時以蜀令移知廣濟
招聚士民於大江洲上防禦流寇胥吏素憚其嚴
亂思為不軌歛血盟曰義營諸紳士亦約洲民歛血
盟曰保定營以敵之衡晏然若不知者時天旱齋戒
步禱諸奸見久無督過意不復猜阻後進香江北廟

諸奸皆從衡已與保定營長密計忽鳴鼓督衆擒其
魁數十人投江中餘黨以靖陞蘄州知州

魏時光

詳忠臣志

唐世照字伯闇瀘陽舉人懷宗末知蘄州吏事明敏
不憚勤勞時流寇往來侵擾賊隔里烟竄處青山鄉
民多流離照於附城通衢掘濠築險分住流民日夜
巡緝寇不敢窺尋以勞瘁致疾卒

張聯芳北直舉人懷宗末令黃梅邑城為獻賊所破

芳至築城垣構官署撫瘡痍集流亡頗著善政

許文岐字我西仁和人懷宗甲戌進士守黃州事詳

總宦忠臣

以上舊通志

吳文爽

梁志仁

單思仁

吳鳳來

盧大受

蕭頌聖

郭金城

以上詳忠臣志

皇清王名世字松谿山陰舉人順治初歷署蘄水黃陂
令俱有政聲又署廣濟下車訪民疾苦廉諸吏奸
狀嚴加懲創請免數年逋賦悉斥陋規弗取聽訟
必盡兩家情事片言折之未幾新令至濟民祈留
不得焚香泣送數十里不絕

白秉正字懿生遼東杏山貢士順治丁亥佐黃郡

斷事明決御物慈祥一郡皆歸心焉時山東屢不
靖總督羅綉錦委率民兵攻取秉正請勦撫兼行
四閱月遂平定四十八砦

郭鳴鳳任邱人順治間守黃州潔已愛民歲旱禱
雨輒應歲荒作粥濟饑多所全活後陞本省興屯
道

楊日昇字白石富平舉人順治四年令黃岡撫凋
殘招流亡省刑薄稅慮無不周歲旱設壇虔禱甘

澍立應素性清介囊橐蕭然猶捐俸設粥廣勸糴賑災民以濟

王絲合肥舉人順治十八年任黃州推官斷獄明允矜慎每為死囚求生理不得執筆低徊至廢寢食臺使多委以讞決

李雨露山東人順治己丑進士令羅田單騎就道與民同苦樂時寇賊未息城市為墟需多方設備勦撫兼施招集流亡開墾荒田汰押差革陋規興

學課士歷任六載邑以安集

李孫字德馨陝西狄道舉人順治甲午令蘄水性
勤敏簿書裁決皆出一手為治務敦大體崇節義
禁捏誣脩建廨宇規制宏遠以忤上官去士民愛
戴不忘

程大順字抒白邵陽貢生順治丁酉任廣濟訓時
文廟久燼丁祭行於佛寺乃與教諭傅鏗同力興
造約諸生勸事新殿克成邑令以私忿辱衿士力

護之士被冤抑及通邑痛苦悉為陳辨捐俸倡脩
邑志自處布衣蔬食澹如也

王潞字又韓餘杭人由恩貢令麻城八年修舉廢
墜擒勦賊寇有封疆功舊例南糧皆收貯岐亭水
次後移城內東南達宋埠時或淺涸運送艱難潞
率里長至宋埠水次收納費省十之二

詹人訓常山貢士順治間令黃安清操冰潔性坦
易近人嚴束吏胥聿興文教士民樂之

劉國寧字漢章遼東恩廕順治七年令黃岡催科
有法革一切陋規邑當水陸衝長江上下兵艘差
騎接踵而至寧單騎迎之民以不擾邑多大災預
設撲滅具有警輒身先往救時年僅弱冠邑人稱
為神君

張一躍直隸樂亭人康熙間由拔貢令黃安性清
介御吏甚嚴不稍假嚙笑愛民切至勸諭如家人
父子捐俸五百餘金修復廟學

徐籀字亦史吳縣舉人令黃岡風流蘊藉綽有吏才黃人謂以文學治民者必首推徐尹焉

王宗臣陝西人為黃州城守副將當搶攘時民間苦兵宗臣御兵有方約束甚嚴無敢秋毫擾民者卒於官民咸徃弔

以上舊通志

范可奇任黃州守捐俸修育德克己養正明善四齋及敬一亭尊經閣聚郡士課誦廣積貯治道路築隄防復於邊江渡口多設大舟以救風波之險

施楷瘞骨善政不可殫述祀名宦

于成龍字北溟永寧州人累官黃州守值東山賊起委令勦撫並行龍計擒賊首誅之餘黨皆平性剛嚴明決一切疑獄重案判斷如神積盜皆為斂跡時討吳逆大兵雲集辦理軍需著奇能後以卓異去祀名宦

宋聲字牧仲商邱人由廕生授黃州府通判事母純孝築將母樓於署中以承歡時當西山征役之

後民力凋敝，弊多方撫恤，嚴行保甲，盜賊皆遠遁。
施綿衣，散藥餌，作育人材，捐俸修復雪堂竹樓墨
池，以祀先賢。在任六載，丁內艱去任，百姓呼號送
之。祀名宦。

舒士貴，北直大興監生，歷官黃州知府，舊例行戶
由府給牒，狡獪藉派累民，貴廉其弊，但取完額餘
俱革除，並刊碑永禁。歲旱，虔誠步禱，甘霖立沛，以
疾卒於官。祀名宦。

安陸府

漢馮野王漢書馮奉世傳野王字君卿潞人奉世子
補當陽長以治行遷大鴻臚

南北朝薛安都宋書列傳河東汾陰人孝建元年魯
爽判遷輔國將軍竟陵內史爽使弟瑜率三千人出
小峴自以大衆阻大峴世祖遣安都步騎八千渡江
討爽爽軍食少引退安都率輕騎追之及爽於小峴
安都望見爽便躍馬大呼直往刺之應手而倒

夏侯竄宋書列傳字世龍譙郡人天監八年為司州刺史領安陸太守居州甚有威惠邊人悅服

夏侯夔宋書夏侯竄傳夔字季龍累遷司州刺史領安陸太守時湛僧智圍東魏元慶和於廣陵入其郛魏將元顯伯率軍赴援僧智逆擊破之夔自武陽出會僧智斷魏軍歸路慶和於內築柵自固及夔至遂請降凡降男女四萬餘人由是義陽北道遂與魏絕
裴邃梁書列傳字深明聞喜人天監中竟陵守開置

屯田公私使之

程文季陳書程靈洗傳文季字少卿新安海寧人以
直兵參軍助父靈洗鎮郢城華皎平父子並有捍禦
之功靈洗卒文季盡領其衆起為超武將軍仍助防
郢州

隋房彥謙隋書列傳字孝冲臨淄人仁壽中長葛縣
令治行為天下第一超授郡州司馬州久無刺史事
務皆歸彥謙著有異政薛道衡一代文宗位望清顯

重彥謙為人深加友敬

唐狄仁傑唐書列傳字懷英并州人為豫州刺史越王貞之亂宰相張光輔討平之將士恃功多所求取仁傑拒之不應光輔怒曰州將輕元帥耶仁傑曰明公董戎三十萬平一亂臣不戢兵鋒使無罪之人肝腦塗地且縱邀功之人殺歸降之衆如得尚方斬馬劍加于君頸雖死如歸輔不能詰心甚銜之還都奏仁傑不遜左授復州刺史

李齊物唐書淮南王神通傳齊物字道用太原人元宗時河南尹坐與李適之善貶竟陵太守明一統志齊物守竟陵見陸羽於僧中授以詩後其子名復亦知復州周愿詩八十年前棠樹蔭竟陵太守公先人五代郭延魯五代史列傳綿上人以功累遷復州刺史嘆曰吾先君為沁州九年民到於今思之吾今得為刺史其敢忘吾先君之志益廉平自勵民甚賴之秩滿州人乞留不許遮道攀號時刺史皆以軍功拜

恃功縱害而延魯父子特以善政著聞

宋孫庸宋史孫何傳庸汝陽人宋初知荆門軍善於治民教養有方父老傳其名不泯二子曰何曰僅於郡之東山築室讀書後相繼大魁多士

王琪宋史王珪傳琪字君玉華陰人仁宗時知復州民毆佃客死吏論如律琪疑之留未決已而新制下凡如是者聽減死

王益柔宋史列傳字勝之河南人仁宗時范仲淹以

館閣薦之除集賢校理因預蘇舜卿秦邸會醉作傲歌賈昌期等列狀言益柔罪當誅韓琦救之黜監復州酒稅

李參宋史列傳字清臣鄆州須城人以蔭累知荆門軍荆門歲以夏伐竹輸荆南造舟日久多蠹惡不可用牙校破產不能償參請冬伐竹度其費以給害遂除

唐介宋史列傳江陵人知復州有善政其子淑問亦

通判是州詳見荊州人物

張垌明一統志元符中垌知復州張耒送詩云風流
家世仁人後愷悌歌謠楚俗傳

万俟湜明一統志大觀中知復州公勤清約有善政
州人稱之曰前有王琪後有万俟

陳純夫姓譜字德全永州人初以廕補齋郎父邁守
郢純夫繼父之後郢人稱之不啻召杜歷仕四十二
年確守名節世號湖南夫子

岳飛宋史列傳字鵬舉湯陰人紹興四年為德安府制置使抵郢州城下偽將京超號萬人敵棄城拒飛飛鼓衆而登超投崖死復郢州

洪适宋史洪皓傳适字景伯鄱陽人皓子高宗時知荆門軍應詔上言寬恤四事輕茶額錢他州代貢禮物闢試闈以復舊額蠲官田令不種者輸租

葉蓁姓譜字實之義烏人高宗時知荆門會建議築城惠蒙二山之嶺蓁執不可遂解印綬去

吳昉詳忠臣志

陸九淵宋史列傳字子靜撫州金谿人光宗初知荆門軍民有訴者無早暮皆得造於庭即為酌情決之多所勸釋其有涉人倫者使自毀其狀以厚風俗惟不可訓者始置之法境內官吏貪廉民俗善惡無不周知嚴保伍之法賊發擒之不逸一人荆門無城乃請於朝城之每旱禱即雨丞相周必大稱荆門之政為躬行之效

黃從龍

詳忠臣志

楊文仲宋史列傳字時發彭山人寶祐元年進士調復州學教授轉運使印應飛辟幕府辨嫠婦冤獄應飛薦之荆湖宣撫趙葵署文仲佐分司幕姚希德江萬里合薦文仲學為有用後至集英殿修撰

施子仁

詳忠臣志

邊居誼

詳忠臣志

元賈泰亨明一統志至元中京山尹首新學校有惠

政及民

白景亮元史列傳字明甫南陽人至正間尹沔陽分民戶為三等九則以均徭役濬天門河造浮橋以利民涉郡人德之

張寬明一統志至正間守沔陽有廉能聲嘗值歲澇民不聊生請於朝給粟賑恤郡民賴以生全

聶炳

丑間

明安達爾

俞述祖

以上詳忠臣志

明沈仁一名友仁濠州定遠人元季羣雄四起仁舉義於鄉後歸明太祖從征有功授沔陽衛指揮同知代吳復守禦脩築城塹建置官署兵燹之餘民賴以安

史純一洪武初知潛江甚有幹才多所創建民不知

勞

以上舊通志

從貞字伯剛繁昌人明一統志安陸衛指揮使居官清儉出入惟一家僮前導蕭然若寒士管領漕運尤愛惜士卒州為之謡雖三尺童子能頌其美

余彥誠德興人明一統志洪武間由人材知安陸州賦役均平勤於撫字民至今頌之

李文秉温州人明一統志洪武間儒士知京山獎勵學校勸課農桑時稱其廉能

應伯和處州人明一統志洪武間知荊門律已廉介

治民仁惠去任惟琴書而已

陳申閩縣人明一統志洪武末由舉人知安陸州勉勵學校均平賦役以廉能稱

王孟福清人明一統志永樂中由博士知沔陽廉介自持有文學善於撫字民至今頌之

李震撫寧人明一統志宣德初知沔陽剛介不阿善於撫字脩飾學校後以老去民不忍舍

嚴貞明一統志洪武初任竟陵廉介有為孜孜愛民

楊季安字懷忠安福監生明一統志宣德中知天門
時沔水汎溢城邑俱壞安大修隄防捍之民免胥溺
陳敏政錢塘人正統二年由進士知潛江處已清約
臨政寬和尤篤意學校

舊通志

毛祥西平人舉進士明一統志正統五年知京山清
廉愛民時縣丞易緯亦能撫字父老相傳云毛祥在
任僚幕得人

陳詢字文同華亭進士明一統志正統間以侍講學

士調知安陸州涖政寬簡篤志學古惠愛在民久而不忘

朱輝豐城人景泰中任安陸學正性剛介行篤學優嚴於師道教人以孝弟節義為本雖貴遊子弟不少假借至夜則省諸生誦讀七年不倦卒於官諸生號泣經紀其喪

舊通志

鍾順字必華南海人明一統志景泰中知沔陽廉慎愛民時寇擾荆沔計擒之士民安業

張蓋南溪監生明一統志景泰中知京山公平正大
杜絕苞苴值歲歉積穀萬七千餘石盡發賑民全活
至三萬餘口

張順字弘裕錢塘舉人天順初任沔陽學正善詩文
草書訓誨諸生時以古道相劘切

方銓新城鄉貢除安陸學正嚴教條勤講課精於易
學凡治他經者訪鄰郡明經之士為具幣遣師之其
父性嚴潔自居一室銓每晏歸冠帶候門侍立雖丙

夜必寢而後退少拂意不免笞撻孝友雍睦以身為教成就之士甲於一時以上舊通志

陰子淑楚紀字宗孟其先崇陽人徙居四川內江成化壬辰進士知荊門鯁介不阿興學敦倫尤篤撫字建陸文安祠於蒙惠泉脩築橋梁城池廨舍百廢俱興

姜英政和舉人明一統志成化中知當陽涖事公勤臨民平易惠政甚多去任後民歌之曰姜當陽古循

良自去後德難忘

孫衍楚紀華亭進士成化中知沔陽操履勤慎法令嚴明郡事無不脩舉父老相傳沔守第一

姜綰字玉卿弋陽進士明一統志成化末知天門時制度簡陋蠹弊漸深綰刷剔振作復為規畫興學墾田以文章飭吏事吏畏民懷

董傑楚紀字萬英涇縣人弘治初進士疏論經筵事知沔陽時大旱蠲租開廩賑之民荷更生

張壘歸安進士弘治六年任荆門清廉慈惠勸農興學旱禱即應荆民戴如父母

史華渭南監生弘治間知潛江勸課農桑葺理學校諸所廢墜固不振興一時訟簡盜息

林啓同安人成化丙午鄉試第一弘治時授安陸學正諸生貧者多助其費科目日盛分校順天四川鄉試號得人

方向桐城進士弘治中知安陸州居官廉儉惟一僕

自隨嚴峻剛正人不敢干以私篤於愛民有古循良

風考滿當陞興藩特奏留之

以上舊通志

徐咸楚紀字子正海鹽人弘治乙丑進士知沔陽捐俸修學發粟賑農

夏元邳州舉人正德初知京山才識通敏時大盜攻城人心洶懼元建策築城規畫廣狹後人因之卒賴保障焉

郭郁新鄉舉人正德初為京山令性剛方有幹略庭

無留事獄無滯囚時歲歉盜起郁拊循有法境內晏然

李濂字川父祥符人正德進士知沔陽吏事精敏政暇引諸生講論多所啟迪

以上舊通志

陳良玉字德夫富順進士明一統志正德中知天門識度深遠操履方潔事無易劇審發無不奇中時單騎行田間勸課農桑與諸生講論不倦一邑翕然稱治

儲洵字平甫泰州進士明一統志嘉靖中以兵部郎中左遷知沔陽時歲數歉民力凋瘵專務休息賑饑移粟分給遠近征需不急者皆罷以身任咎又奏脩隄防言甚剴切

周延字南喬吉水進士嘉靖初知潛江會大水賦逋特疏於朝得賜蠲免未幾以才調繁民遮留不得立祠祀之

舊通志

蕭廷達朝陽舉人明一統志嘉靖初知潛江剛介清

苦人所難及修學校建倉儲江漢水溢齧學宮障以石督築隄防邑賴以全厥功甚偉

鄭文茂字實夫縉雲人嘉靖癸丑進士選刑部郎出守安陸中貴頗恣睢而留守司借以為援相比為奸即臺使莫能制茂獨抗之使不得逞地方賴以綏靖時漢水數泛溢為屬邑患茂築隄捍禦民受其利

舊

通志

范昕絳州人明一統志嘉靖中同知承天府嚴明剛

介清苦自持忤鎮守太監廖斌誣奏謫戍南海堅貞之操始終如一御史包節稱其居官廉潔應變開豫人所難及云

陽東字路震鄴都舉人嘉靖間知京山精於吏事條格井然以恩威著稱時巡按王秀深相器異嘗引以自隨巡撫黃衷以宿憾欲摭他事擠誣之東操履正直終莫能變

教鉞字秉之高安舉人嘉靖間令潛江果敢任事邑

被大水疏於朝得免民租之半又疏開新河以殺邑水號曰恩江

袁福徵字履善華亭人嘉靖甲辰進士官刑部郎中謫守沔陽事有便民者移文上官縷縷數萬言熟議施行多所裨益

丘宜字汝中新建舉人嘉靖間知天門繕墜塹簡供億權郵遞興學校諸廢悉舉又續修縣志若干卷

侯嘉祥橫州舉人嘉靖中任當陽時邑多徵求川路

夫馬非額設祥搏節措置自奉甚薄贖鍰毫釐不自
潤民羅仲仁夜殺二弟以盜告祥察其詞色叱之曰
汝殺弟當誰捕竟抵其罪一邑稱神

楊鳳翥字卷阿巴縣舉人萬厯間知鍾祥清理額賦
編審丁徭興學校賑災民修隄防平市價為政期年
百務俱舉

沈有儒字子真臨海進士嘉靖間以刑部員外謫沔
陽同知出入屏除前導開平政廳於馬侯祠公餘賦

詩與諸生談學業衣食如寒素比歸惟圖書數卷

房守士字升甫齊河進士萬厯間守承天政尚寬平
胷中無城府朔望與諸生講明性理其要在於真知
而清風勁節更足法云

葉善樂平進士萬厯間任潛江訓導守有學行尤長於
詩文邑中諸名勝多所題識纂輯邑志

陳席珍字君聘富順舉人萬厯間任沔陽奉例清丈
復沔侵界編簽里甲時絕甲田產旁郡皆勒民上直

珍毫無所問又修築隄防水不能害

劉繼禮字公立宜賓進士萬厯間任天門歲饑捐俸
三百緡為完逋賦襄郢水漲大璫欲曲防有害於邑
毅然爭之復以漁課事請下所司徵解因忤分巡意
請假歸

朱熙洽字鴻甫崑山進士萬厯乙亥任潛江清惠強
直潛數患水田賦畸輕畸重洽以清田請於上豪猾
數撓之法卒行無敢尺寸隱者始剏為城堞決歲功

成

潘之祥字伯和婺源進士萬厯間任潛江時稅璫煽
煽邑里騷然祥縛不逞數人投之水羣凶斂迹

王念祖字孝先武進人萬厯間進士任潛江念邑大
患在水又多盜一以振刷嚴厲為事但求有利於民
不顧忤巨紳意後因開古河洩水勢卒以受過

夏啟昌字六咸雲南臨安人萬厯間進士授京山令
訟賦徵集第刻木板為伍伯形使約保郵至其家如

期赴理催徵分為四季課責惟正之外不科一錢嚴
覈驛遞省惜馬錢數年村落城郭無他憂

徐天祐臨海人萬厯間任荆門慈祥愷悌揮淚用刑
時土司援遼者來徃如織胥賴調停民得安堵

徐待任常熟舉人天啟間以婺源教諭陞沔陽知州
長於文學有善政革火耗清弊孔築隄防大造編審
里甲稱平

任贊化字參之聞喜進士天啟間調繁天門邑多積

連取細戶冊次第布之革詭糧立里戶平設六櫃許
納戶自投復親徵漕糧掾吏不得高下其手領解邊
餉毫弗累及里役

羅萬象字仞菴南昌舉人懷宗十年令潛江會邑大
祲饑民聚衆相奪勢不可止象取巨魁二人立斬之
揭竿以示餘烏獸散復建北關以固城圉創教場以
習騎射徵糧立連環票杜奸里包噬之弊

張自新分宜人懷宗時任京山尉流賊盤踞羅漢嶺

新統民兵往勦衆寡不敵中傷死

張曠字于野華亭進士懷宗時知沔陽力興學校人士多所識拔闖賊陷郢沔有奸徒欲為內應擒殺之未幾賊帥白旺擁衆攻沔力拒不支城遂陷曠計圖恢復不遂抱憤以卒

章聚奎字文明臨安人明末由拔貢授京山令於郵傳里督多所優卹每歲冬春間繕城濬池備禦流寇後領武昌監紀同知尋以病致仕

牛光斗陝西人明末任荆門甫至闖賊犯城率鄉兵
百人直擣賊營賊傾知為西人遁去追殺數十人
以

上舊通志

盧學古

馬颺

沈壽崇

蕭漢

張效芳

程之奇

以上詳忠臣志

皇清孫茂槐山東萊陽人順治三年令當陽單騎赴任
身衣皂綈多補綻甫下車收瘞白骨招撫流亡時
邑里少牛以人負耒耜茂槐見輒下馬流涕諸生
不能自給為謀糴殮且助其喪具惟疾惡有蠹民
者立杖斃之邑西北亂黨周國酉等盤踞上聞勦
之旋以疾卒於官


金先聲字五鍾江陵貢士任安陸府學訓導博通

經史工詩文教士循循有法為一時師儒之冠
李啟元字復菴大興舉人順治十年知安陸府平
易近民務存寬厚尤加意學校值湖南用兵民困
供億措置有方以積勞成病卒士民祠祀

張金基字寶持廣濟舉人性孝友負母避亂山中
兵至斫其妻金氏碎腦死金基攜幼女奉老母嚼
雪得生後為孝廉康熙十三年授沔陽教諭教士
有法卒於官櫬歸庠士數百人哭泣送江上

以上

舊通志



湖廣通志卷四十三